

四庫全書

史部

欽定四庫全書

建炎以來繫年要錄卷一百五十七

宋 李心傳 撰

紹興十有八年

歲次戊辰金熙宗宣皇統八年

春正月

按是月庚申朔戊辰左

奉議郎諸王宮大小學教授林大鵠為太常寺主簿仍兼秘書省校勘書籍大鵠初為舉子嘗答策言秦檜靖康忠義之節檜時間居永嘉見其文默識之至是稍獲

薦用

大鵠初見紹興十三年十二月

己巳上幸天竺寺遂幸玉津園

庚午入內東頭供奉官康諱還所寄資為左武大夫和
州防禦使帶御器械謂尋改宣政使

諱改使額在二月癸巳

丁丑太常博士駱庭芝罷先是參知政事段拂聞趙鼎
死於海南為之歎息秦檜怒殿中侍御史余堯弼將按
拂罪先奏庭芝密與執政私交漏泄機事遂罷之自是
拂不安於位矣 左承議郎張闡添差通判泉州自秦
檜專國朝士為所忌者終身以添倅或帥幕處之未嘗

有為郡者

辛巳命權戶部侍郎李椿年同看詳諸路監司郡守條具裕民文字

壬午殿中侍御史余堯弼入對論參知政事段拂滅弃人倫頃為小官身對賓客嘗使其父執爨具食官於行朝陰交非類濫居政府漏洩機政伏望薄行流放以清表著

乙酉右正言巫伋入對論建炎間建康通判楊邦乂仗

節死難段拂遂攝倅事恬不知愧蹤居政府乃與小臣私交漏泄政機又嘗語典謁者曰我豈是執政伏望亟賜寘逐

戊子輔臣進呈上語及人材因謂秦檜曰士專謀身國家何賴勵世磨鈍惟在進賢退不肖檜曰此乃致治之要上曰但審其賢否而進退之則人自知勸沮矣

二月癸巳上諭大臣曰兩浙漕司舉人聞有勢之家行賂假手濫占解名甚喧士論今貢舉鎖院在近可令禮

部立賞許人告捕甲午詔假手者許就試舉人告獲取
旨補官仍賜出身

乙未參知政事段拂罷為資政殿學士提舉江州太平
興國宮用臺諫奏劾也章再上尋落職興國軍居住
簽書樞密院事汪勃兼權參知政事

丙申布衣鄭樵為右廸功郎以經筵官秦熺等言其學
術也 福建安撫使薛弼言近旨統制將官離軍添差
州都監已上並依見任人切詳諸軍將官係因功或年

勞不拘大小使臣一時陞補即與祖宗差注將副格法
不同切慮負數太多繁紊軍政欲將元在軍中係大使
臣充將官有朝廷宣劄人並支破釐務請給人從免令
干預職事從之

己亥入內東頭供奉官楊公恕還所寄資為武顯大夫
帶御器械

壬寅左朝請大夫監尚書六部門張頡面對乞令諸路
災傷檢踏官不得於稅戶止宿及接見賓客詔戶部看

詳

甲辰左中大夫知太平州范同引疾請奉祠詔復左太
中大夫令終任

庚戌入內東頭供奉官王晉錫幹辦內東門司左朝請
郎呂延年知蘄州代還言自五季之亂江南李氏窮兵
暴斂害虐生民乃於江西一路稅苗數外倍借三分上
應軍須至開寶八年李煜圖籍歸本朝而當時官司但
名為沿納蓋謂事非本朝創立特循沿李氏舊法也積

歲既久而官司又以沿納一項錢米支移折變故里巷之民銜怨李氏之聲猶在也仰惟陛下憂民疾苦如痛在躬欲乞行下江西漕司如委見本路田產步畝所載稅苗倍於他路即取旨量與裁定仍乞將沿納一項錢米特免支移折變詔戶部取索諸路色目一體看詳申省

辛亥吉陽軍奏責授清遠軍節度副使趙鼎卒詔令歸

薨

壬子右丞事郎監登聞鼓院徐璉面對言自昔帝王必
有佐命之臣功銘鼎彝侑食清廟以勸萬世國家遠稽
三代肇造原廟凡在佐命輔弼皆繪像廟廷以示報功
之意陛下紹開中興復崇原廟如祖宗之制而累朝配
饗輔弼不過十餘人今其家之子孫必有繪像存焉望
詔有司訪求摹於景靈宮廷之兩壁詔禮部討論

三月壬戌詔政和八年已前實得兩解貢人不限年並
特與奏名許就殿試到省一舉見年五十五以上者今

本貫保明申部內開封府國子監舉人召見任京朝官二員保奏並結除名罪當議特與推恩

王明清揮麈錄
餘話云靖康之

亂文字散失不存南渡之後禮部老吏劉士祥者大為
姦利士子之桀黠者相與表裏云某歲曾經省試下合

該年免既下部則士祥但云省記
到因而僥倖遂獲恩者不知其數

壬申名行宮之南門曰麗正北門曰和寧

丁丑上謂大臣曰聞殿前司招軍多誘致鄉民及負販者恐其失業可令吳璘楊政招流民之失所者補其闕庚辰上初詣太一宮以宮成故凡一百七十楹既而禮

部侍郎沈該等言鑾輿詣宮皎日晴霧車駕還內雨澤
復作有此祥應望宣付史館從之

禮部奏下在五
月辛酉

壬午資政殿大學士提舉萬壽觀兼侍讀秦熺知樞密
院事一日太師秦檜問勅令所刪定官胡寧曰兒子近
除外議如何寧曰外議以為公相必不襲蔡京之迹寧

寅弟也

熊克小歷稱寧為祠部郎官按寧此時為選人
克蓋誤也克又稱寧對云云於是檜怒以日歷

考之寧引對改官在此後七日則檜未應怒今不取中
興聖政呂中大事記曰以其子熺為樞密欲以代居相
位而兩府合為一矣

甲申右武大夫保寧軍承宣使兩浙西路馬步軍副都總管王安道落階官為宣州觀察使以解帶恩也時安道之父繼先有寵秦檜使其夫人王氏與之叙拜為兄弟往來甚密

趙甡之遺史云繼先遭遇在紹興中冠絕人臣諸路大帥承順下風莫敢少忤其權勢之盛與秦檜埒張去為以下猶不足道又曰秦檜與其妻黨皆貴戚者非檜薦舉之力乃檜請陞遷繼先宗族及吳孟宗族官職故繼先及中宮亦請陞遷秦氏王氏之官職也甡之此說或因秦檜王安道相繼除擢而言且附此當考

乙酉詔私擅渡淮及招納叛亡之人並行軍法後詔津

戴及巡防人故縱與同罪失察者減一官

後詔在二十九年二月己

丑

右朝散大夫秦亘知峽州

紹興二十六年十月癸亥周方崇奏亘守安豐

以榷場貨獻權臣按日歷亘去年十二月壬辰自安豐代還入對或可附此事也

丙戌權尚書禮部侍郎沈該兼直學士院

是月貢院言博學宏詞科武進尉周麟之婺州州學教授季南壽合格詔並與堂除自是恩始殺矣麟之海陵人南壽龍泉人也

夏四月戊子朔日有食之陰雲不見詔付史館

己丑右迪功郎勅令所刪定官胡寧特引對遂命改京

官寧改官日歷不書今年五月戊辰以右承務郎除太常丞故附見此

庚寅上策試正奏名進士于射殿先是權吏部侍郎知貢舉邊知白上合格舉人徐履等上問以欲起晉唐之陵夷接東漢之軌迹及柔道所理當有品章條貫右迪功郎董德元策言晉之失不在于虛無失於用兵故耳唐之失不在于詞章亦失於用兵故耳東漢固無如是之失也陳孺策言今日中興之盛以言乎內治則大臣

法小臣廉百姓遂其衣食萬物蒙其豐年以言乎外治
則講信修睦中外交懽邊鄙無虞五兵不試東漢之事
未足慕也願申飭邊郡守臣俾兩相撫輯庶幾邊隙不
生遠人益服此品章條貫之一助舉人王佐策言王義
之言隆中興之業政以道勝寬和為本蓋譏當時不務
息民保國而欲以兵取勝也杜牧有言上策莫如自治
蓋譏當時不計地勢不審攻守而徒務為浪戰也況陛下今日任用真儒修明治具足以鋪張對天之宏休揚

厲無前之偉績則光武之治不足深羨權禮部侍郎兼直學士院沈該初考權戶部侍郎李朝正覆考工部尚書詹大方詳定乃奏德元第一孺次之既而以故事遞降遂擢佐為首賜佐以下三百三十人及第出身履永

嘉人德元吉水人佐山陰人也

按紹興二十三年十二月鄭仲熊劾王佐革

疏稱佐曩緣大樹本非廷尉以上三人皆係有官遂致僥冒按此舉第四人乃莫汲當求他書參考

庚子左中大夫知樞密院事秦熺罷為觀文殿學士左通奉大夫提舉萬壽觀兼侍讀提舉秘書省熺言父子

共政理當避嫌故有是命仍詔嬉應于恩數請給等並
依見任宰臣例立班在右僕射之次

辛丑徵猷閣待制邵博卒于捷為縣

乙巳特奏名進士俞舜凱等四百五十七人武舉進士
柯熙等七人特奏名一人賜第授官有差於是始以將
仕郎易京府助教舜凱婺源人也

癸丑敷文閣直學士知建康府晁謙之罷先是左承議
郎方雲翼自禮官罷歸後起為江東安撫司參議官擒

念之薦于謙之雲翼干擾不已謙之怒其無厭以書白之會雲翼代還檜以問雲翼雲翼愕然曰王庶之子比過金陵晁館之于宅堂者四日雲翼嘗勸晁不當留在宅堂恐有詭謀晁即日津發前去雲翼固知其言太深然不料其陰憾雲翼至于此也檜默然即諭殿中侍御史余堯弼堯弼乃奏謙之險薄躁競時無與倫趙鼎負滔天之惡投畀遐裔乃陰與交通書問絡繹王庶詭詐乘僻世所共棄謙之實其僻客每慕其為人庶之子至

今往來請求不絕朋姦稔惡日懷怨望志在動搖國是

故有是命

日歷方雲翼紹興十五年三月癸未除江東安撫司參議官十一月丁未改添左通判宣州建康志謙之以

十五年四月到任

直徽猷閣方庭實提點廣南東路

刑獄公事左朝請大夫新知徽州趙士彩為江南東路

轉運判官

丙辰皇叔安德軍節度使同知大宗正事權主奉漢安

懿王祭祀士袞開府儀同三司以司宗十年也顯謨

閣直學士知平江府鄭滋知建康府滋再守平江政事

多弛兩浙轉運判官湯鵬舉宣言欲按之始奏檜舉進士滋為南省參詳官至是檜因鵬舉應辦北使寓書于滋稱門生鵬舉見之幡然更奏其治狀遂有是命後旬

日又陞顯謨學士

滋進職在五月戊辰

是月慶遠軍節度使知襄陽府張澄始視事襄陽平地當江漢之衝環以大堤歲久為水所圮澄始相葺之度民不可勞而江夏諸將私田占籍境內者倍于編戶澄乃諭使出力修堤皆欣然聽命既成比舊增高周廻數

十里民蒙其利

五月辛酉權禮部侍郎兼直學士院沈該言國家乘火德之運以王天下望用故事即道宮別立一殿專奉火德配以關伯而祀以夏至從之後建殿于太一宮名明離

癸亥直秘閣兩浙轉運判官湯鵬舉入內內侍押班李珂幹辦內東門司王晉錫各進秩一等以太一宮成故也

甲子命有司繪配饗功臣像于景靈宮廷之壁皇武殿
韓忠獻王趙普周惠武王曹彬大定殿司空中書門下
平章事謚文惠薛居正樞密院使謚元懿石熙載鄭武
惠王潘美熙文殿尚書右僕射平章事謚文靖李沆魏
文貞公王旦山南東道節度使同平章事謚忠武李繼
隆美成殿沂文正公王曾許文靖公呂夷簡簽書樞密
院事謚武穆曹瑋治隆殿魏忠獻王韓琦魯宣靖公曾
公亮大明殿韓文忠公富弼重光殿溫文正公司馬光

承元殿魏文定公韓忠彥凡十有六人皆取諸其家惟
熙載家累索不至

乙丑詔歲以成都潼川府利州路稱提錢十萬緡對減
四路激犒錢三分之一初鄭剛中改四川宣副之歲始
命三路茶鹽酒課及租佃官田應輸錢引者每千別輸
三十錢為鑄本又得其贏十八萬緡有奇至是以備軍

費三路稱提錢凡四十三萬七千緡鑄錢本二十四萬
七千緡外餘十八萬四千六百九十九道二百九十一
文入帳此據總領所財賦冊

權尚書吏部侍郎邊知白提舉江州

太平興國宮右正言巫伋論知白闖葺躁進頃宰平江
外邑干郡將鄭滋舉狀不獲近緣接伴經由乃窘以人
使事百端驅動挾私宿怨故有是命

戊辰保康軍節度使提舉佑神觀吳益為昭慶軍承宣
使宣慶使清遠軍承宣使入內內侍省押班張見道為
景福殿使以從幸太一宮特推恩也 右宣教郎監南
雄州保昌縣溪塘鎮周芾特追三官昭州編管芾嘗上
書論事坐狂妄黜及至官自言以上封切直屏棄守臣

奏之下大理鞫治有是命

壬申工部尚書詹大方言近充賀大金生辰使自入境
待遇使人甚厚及至大金闕廷供張飲饌一一精腆臣
已戒一行官吏不得過有須索竊慮後來三節人或有
不識大體責辦供應妄生語言望嚴行戒飭庶幾鄰好
脩睦永久不替詔今後使副及三節人並具知委狀申
尚書省右武大夫閣門宣贊舍人賀仔除名橫州編
管仔嘗為利州路兵馬都監至是詣都堂訟鄭剛中功

績尚書省奏其欺罔乃有是命

癸酉以太一宮齋殿後隙地為景靈宮道院

乙亥殿中侍御史余堯弼言今歡盟既固聘問之使安

行無虞而恩澤所加不減于舊鄰國聞之其謂我何望

裁抑適中以堅鄰好詔禮部參酌如所請奉使賞賜例
見紹興十二

年五月乙辰降旨 于是賜物及賞各減半七月庚辰降旨

丙子金主使龍虎衛上將軍會寧尹蕭秉溫昭武大將軍充東上閭門使申奉顏來賀天申節始燕射於玉津

園自是遂為故事

癸未保信軍節度使龍神衛四廂都指揮使添差兩浙
東路馬步軍副都總管李顯忠落軍職降授平海軍承
宣使提舉台州崇道觀本州居住先是金使嘗言顯忠
私遣過界詔令分析會顯忠上恢復之策於朝奏檜怒
乃奏顯忠不遵稟聞止用申狀故有是命

此以日歷及顯忠行狀趙

姓之遺史參修遺史云李顯忠聞其妻周氏在黃龍府作繡工遣三人往取之共許金千兩各人奏補承信郎三人果至黃龍府用籠床去其裏隔盛周氏載之以車遂達江南三人皆喜曰太尉更有妹在燕山府願復取

之是時楊存中亦遣人取其故妻止于平江用別宅居之以再娶趙氏不容其來也金人使來因奏今講和乃有臣僚多以金銀遣人來取其家屬恐大金皇帝聞之不便上乃責顯忠落節錢宮祠存中以顯忠獨被責而已無罪遂賂遺顯忠不已且稱其才宜復用而顯忠亦閑居七年徐夢莘會編載此事于紹興十四年正月不知北人以十四年春來言此事至此始行遣邪或甡之所記年月差誤也孫覲撰楊存中妻楊國夫人趙氏墓表云夫人歸楊氏時少師猶未著內籍未幾四方盜起夫人攜諸幼于兵戈中間關百難涉間數載卒保其家而少師亦還朝典軍為大將則趙氏非存中貴後所娶與甡之所云不同當考

甲申罷四川宣撫司徽猷閣待制知成都府權宣撫司職事李璆為徽猷閣直學士四川安撫司錢糧符行中

直秘閣知夔州直寶文閣汪召嗣守太府少卿總領四
川財賦軍馬錢糧專一報發御前軍馬文字武當軍節
度使宣撫司使都統制兼知興元府楊政改充御前諸
軍都統制直龍圖閣知潭州陶愷卒直龍圖閣主管台
州崇道觀劉昉復知潭州右朝請郎廣南西路轉運判
官方滋直祕閣知靜江府上嘗須龍腦為藥而內庫偶
闕求之秦檜檜取一匣進之至上前啓緘而匣內有書
題名銜乃滋送檜者誤不揭去上以為御前所未有以此

趙姓之遺史

本語附入

乙酉龍圖閣直學士知靜州張宗元提舉江州太平興國宮從所請也

六月丁亥朔尚書左司員外郎韋壽成權工部侍郎壽成不及拜而卒

癸巳上謂大臣曰每歲決獄聞憲臣第遣屬官代行徒為文具可令親往所部具所決名件申尚書省 權尚書戶部侍郎李朝正罷以殿中侍御史余堯弼奏其嘗

遣小吏從左帑市絹也 詔自今嘗被僞楚明受僞命

之人不得輒至國門時左從事郎廉布入都調官右正

言巫伋奏布乃張邦昌之婿覆載所不容而無忌憚若

此望賜處分故有是旨

布初見建炎三年二月

右朝奉郎鄭靄

為夔州路轉運判官左朝奉郎楊椿為夔州路提點刑

獄公事靄驥子也秦檜與之親厚故超用之 新除軍

器監丞康與之與外任官觀與之嘗稱秦檜之命往鎮江市玉帶又從都統制王勝借金上聞遂罷之

甲午上諭大臣曰郡守條上便民事可委官署詳有可采者即行之庶不為虛文也

戊戌直秘閣秦堪奏坦並陞直敷文閣以檜辭太一宮使加恩乃有是命 顯謨閣直學士康執權抗章請老詔遷一官致仕

己亥上曰近布衣上書多言縣令非理科率朝廷自和議以後未嘗有取于民可申嚴約束庚子秦檜奏令監司郡守常切覺察上曰自今有作事過當及年老昏繆

者並與宮祠庶幾不為民害 直寶文閣淮陽轉運副使錢端禮陞直龍圖閣知婺州

甲辰用太常寺主簿兼權祕書省校勘書籍林大雋議始築九宮貴神壇於東郊壇二成高三尺方十有原尺

閏

閏

按宋史九宮神壇再成第一成東西南北各百三十尺再成東西南北各一百尺俱高三尺 上為小

壇九縱廣皆八尺高尺有半歲春秋二仲祀以少牢禮

如感生帝

乙巳敷文閣待制知臨安府趙不棄守尚書工部侍郎

尚書右司郎中宋貺權戶部侍郎直祕閣兩浙轉運判
官湯鵬舉陞直敷文閣 知臨安府直祕閣陸宰卒
丙午賢妃潘氏薨妃元懿太子母也在妃列二十二年
至是薨

丁未上諭輔臣曰近有布衣上書請行三舍法恐未暇
及此其有言民事者宜付戶部可行者即行之

戊申士民曹溥等千三百人進表請上尊號上不許

癸丑大理少卿許大英面對乞戒飭監司不依條限巡

歷及朝廷而委輒遣官代行者比司互察詔申嚴行下
乙卯上曰祕府見求遺書古蹟四川不經兵亂可委諸
司尋訪仍令提舉官每月趣之 左奉議郎新知江州
吳秉信罷秦檜怒鄭剛中不已遣太府寺丞宋仲堪即
江州置司究其陰事殿中侍御史余堯弼奏秉信乃剛
中心腹之人昨者乘間親至川陝士論多有指議恐江
州官吏觀望必不能協心盡公為害非細故秉信遂罷

建炎以來繫年要錄卷一百五十七

欽定四庫全書

史部

建炎以來繫年要錄卷一百五十九

詳校官侍讀學士臣陸伯焜

侍讀臣孫球覆勘

勝錄貢生臣沈 煥

勝錄監生臣劉 培

欽定四庫全書

建炎以來繫年要錄卷一百五十八

宋 李心傳 撰

紹興十有八年秋七月壬戌太尉安慶軍節度使提舉
萬壽觀邢孝揚特許任便居住以孝揚引疾有請也

甲子御史臺主簿陳夔諸王宮大小學教授曹筠並守

監察御史

夔永嘉人初見十三年

時二人俱引對夔乞申嚴内外

謁禁筠乞戒勅守令務在安靖於是二人同命

夔奏劄以是月

己巳行下筠奏劄以是
月癸酉行下今聯書之

乙丑右朝奉大夫新江西轉運判官賈直清乞於縣官
中選有出身人兼縣學教導上謂大臣曰州縣選官教
導乃教化本原將來三年科場亦有人材可備採擇乃
令禮部參酌如所請八月壬辰行下

壬申右承事郎韓彥古直祕閣彥古世忠少子也

癸酉皇叔光山軍承宣使知西外宗正事士樽為岳陽

軍節度使

甲戌尚書禮部侍郎周執羔右司員外郎權中書舍人
吳臬並罷以殿中侍御史余堯弼論執羔送伴北使至
平江輒生事臬急躁好罵故也 入內內侍省押班張
見道陞延福宮使見道與其養子內侍省押班去為並
為景福殿使去為請以解帶一官回授見道上許之

丁丑殿中侍御史余堯弼守侍御史右正言巫伋守右
司諫仍並兼崇政殿說書尚書祠部員外郎陳誠之試
國子監司業祕書省著作佐郎惠普安恩平郡王府教

授王墨卿守起居舍人

戊寅言者乞令州郡建閣以藏宸翰上以其勞民不許
癸未敷文閣待制提舉江州太平興國宮張嶼獻紹興
中興復古詩詔嘉獎嶼尋卒

甲申直敷文閣知臨安府湯鵬舉言陛下獨任一德臣
以偃干戈皇華交賚結轍於道而沿流諸邑或尚存焚
舍以待使人望詔有司下所經由程頓並令修建庶幾
賓至如歸從之限今冬畢

八月丙戌朔右朝散大夫知鎮江府榮嶷知揚州 龍圖閣直學士提舉江州太平興國宮李迨卒

丁亥刑部員外郎張憲面對乞闢太學增弟子員詔禮部看詳 降授武功郎韋訊復達州刺史 添差兩浙東路馬步軍副總管崇慶軍節度使致仕葉夢得薨於湖州贈檢校少保

戊子樞密院編修官林機祕書省校書郎劉章並為著作佐郎兼普安恩平郡王府教授

己丑左宣義郎何逢原充樞密院編修官

辛卯刑部郎中李如剛轉對乞諸路憲臣不親行踈決者令帥漕糾舉以聞詔申嚴行下如剛濟南人也 閣州觀察使知閭門事何彥良卒

癸巳權禮部侍郎沈該乞四川類省試合格不赴殿試人第一等並賜進士出身餘人同出身從之自行在吳中蜀士不就廷試榜首率依第三人推恩講和後稍稍來奉大對是舉類試策問古今蜀人材盛衰之故而德

陽何耕對策極論蜀士徇道守節無心於世引楚相子
文三仕三已之說為證又言李固無大雅之明哲卒陷
於跋扈將軍之手議者固已少之若相如作封禪書蓋
孟子所謂逢君之惡楊子雲作美新以媚賊又蜀人所
羞道有司定為榜首秦檜見其州里大惡之曰是敢與
張德遠為地耶會耕以後至乞推恩檜批送禮部措置
該喻其意即言今舉有試中高等之人為見先有已降
等第推恩名色及慮御試却中底甲往往在路遷延日

月才候試畢便自陳為病趣赴不及顯屬太優檜入熟
狀畫可自是遂為故事

丙申端明殿學士簽書樞密院事汪勃罷勃為言者所攻
以親老乞歸養詔依舊職提舉江州太平興國宮

丁酉工部尚書詹大方為端明殿學士簽書樞密院事
尋權參知政事權尚書禮部侍郎兼直學士院沈該充
敷文閣待制知潼川府 詔劉婕妤祖母太孺人唐氏
特封永嘉郡太夫人 右武大夫果州觀察使兩浙東

路馬步軍副總管馬泰卒於婺州特贈三官卹其家甚厚

庚子監察御史張杞面對乞州縣之吏有政績者令監司郡守考覈聞奏不得令士民飾詞妄有舉留從之戊申左中奉大夫知郢州趙叔淳代還乞令諸路總領官及都統制增闢營田庚戌詔戶工部立法賞罰叔淳又言陛下即位以來用人多矣其間或持兩可或專征戰政出多門競持異議故後艱弭亂畧無寧歲賴上獨

斷登用者德專任一相坐致不平望以今日得人專任之效宣付史館癸丑簽書樞密院事詹大方進呈上顧秦檜曰此卿之功也朕記卿初自金歸嘗對朕言如欲天下無事須是南自南北自北遂首建議朕心固已判然而梗於衆論久而方決今南北罷兵六年矣天下無事果如卿言檜頓首謝曰和議之諧斷自宸衷臣奉行而已何功之有 刑部尚書兼權吏部尚書周三畏罷以侍御史余堯弼論其兼領二曹一切要譽歸

怨朝廷也

甲寅國子司業陳誠之權尚書吏部侍郎 大理卿韓仲通權刑部侍郎先是幕士張問自言羣盜夜入其室縱掠而去詔臨安府追捕甚急積五六月連逮百餘人獄具而復有告真盜者乃改付大理獄仲通曰輦轂之下有行剽者詔獄推治而不得主名吾固惑之其母太令人劉氏曰吾見閭閻不肖子弟竊父之財母蔽昵不告給以為盜者多矣試物色求之仲通悟翌日以耳目追

跡其人與常所往来通行飲食之家凡所告失亡一日盡獲無秋毫之漏於是問妻與子以誣坐論如律而百餘人者破械縱去囹圄遂空此據孫覲撰劉氏墓誌增入觀稱以此擢仲通刑部侍郎而今年九月癸巳余堯弼劾范詢章疏稱閼大鈞之獄賴寺御守正不得曲法則仲通之遷未必以此也或謂仲通與秦檜之給使丁祺深交祺引之也

閏八月庚申秦檜奏兩國通和農民安業墾田漸廣戶部財賦粗足支用乞免江浙湖南今年和糴和糴事初見元年年末上大喜曰朕向在河朔見民以為苦朝廷所降本錢

州縣往往移用不以時給縱有給處又為吏多端乞取
十不得一二今幸時和歲豐軍儲粗足朕豈已而不已

也

中興聖政史臣曰漢孝宣光武生長民間其知民疾苦宜也高宗以諸王總戎河朔周知民間穢惡利害

雖即位二十年猶能歷歷及之此明主之所難也

親衛大夫忠州刺史鄆州

駐劄御前選鋒軍同副統制梁興卒興自太行山率其徒奔岳飛於江夏從軍凡十年

壬戌左中奉大夫趙叔淳知湖州右朝散郎曾惇知鎮

江府

左太中大夫知太平州范同薨癸亥詔復資政殿學士致仕

甲子遂命臨安平江府淮東西湖北三總領所歲糴米百二十萬石有奇用戶部請也浙西凡糴七十六萬石行在省倉三界三十五萬五千臨安平江府場各二十萬淮西總領所十六萬五千湖北淮東皆十五萬石時行在歲支凡三百三十八萬石有奇而江浙荆湖上供米綱才三百萬石故糴之三總領所舊不立額及是比

行下

丙寅左奉議郎黃祖舜主管南外敦宗院

戊辰權禮部侍郎陳誠之請太學生入學五年不與薦及公試不入等者除其籍從之 改行在熟藥所為太平惠民局

己巳直祕閣江南西路提點刑獄公事林大聲罷右司諫巫伋論其總賦淮東措置乖方及為江東漕妄費官錢故也

孫龍撰大聲墓誌云公治財知取予在戶部稽考諸酒庫積贏錢數十萬在總領按尺籍移軍

實杜吏謾復得贏錢十萬於時權貴人用事納四方之賂鬻買官爵門如市矣一時向慕奔走爭先黃金白璧明珠大貝象犀錦綾奇怪之物車連轂舟銜尾相屬於水陸之道連晝夜不絕或謂公所沽絲錢有羨盍致其餘無為獨醒也公曰吾起諸生擢名第歲月推遷遂躋省寺又欲以貨耶竟無所獻會有告公部內葉珪作詩語涉譏謗者坐是貶秩罷歸按紹興二十七年王珪劾大聲降官乃稱將漕江東縱子弟受賂不法有訐之相府者移江西憲與覲所云全不同以日歷考之大聲降官在紹興二十一年八月其罷歸已久覲實謬誤

庚午大理寺丞孫敏修面對乞兵級犯罪及強盜同火七人已上並作情重法輕奏裁詔刑部看詳

壬申命起居舍人王墨卿武經大夫惠州刺史兼閩門

宣贊舍人蘇曉賀金主正旦權尚書禮部侍郎陳誠之
武經大夫吉州刺史權知閣門事孟思恭賀生辰

甲戌秦檜進呈禮物數上曰朕觀金國和意甚堅自講
好以來於今七年未嘗非理有所邀求朕每遣使必戒
約三節人毋得生事蓋所以固兩國之懼期於與民休
息而已

丙子集英殿修撰知福州薛弼言本州亢旱既而大雨
忽傳侯官縣有竹實如米老稚採取所得幾萬斛饑者

賴以濟此蓋明天子聖德所感上相廢理之效實為中興上瑞伏乞詳酌施行詔付史館

戊寅詔川廣荆湖應奏獄案以副本申提刑司別奏令刑部以奏狀先到者約法先是大理正元龜年面對論遠方獄案不無遺滯乞立法至是施行 湖州言保義郎林昌朝四世同居詔旌表門閭 太學博士王之望知荆門軍以葬親有請也

辛巳大理寺丞周陸面對請縣令滿三年無公私過從

本郡保明推賞詔刑部看詳後不行

壬午右朝奉大夫主管台州崇道觀張昌提舉江南東

路常平茶鹽公事

癸未執政進呈監察御史陳夔論州郡歲以常平米廩給貧民今多移用乞令監司覺察上曰此誠仁政所先比年州縣奉法不虔或侵支盜用而監司失於檢察或賑濟無術而僻遠窮困之民不得均被其惠非所以稱朕矜恤元元之意宜令戶部措置 詔入內內侍省聽

喚使臣自今以六十人為額

甲申勒停人降授武功大夫辛道宗房州羈管時道宗
寓居嚴州侍御史余堯弼奏道宗移居近地窺伺朝廷
陰為不靖望序之遠方故有是命 左朝請郎賀允中
添差福建路安撫司參議官允中嘗為福建提刑見謂
稱職秦檜以其不附己復令入帥幕以抑之

乙酉詔自今奉使下三節人過界與北人博易者徒二
年使副不覺察與同罪 初福建路自創竒兵而虔梅

草寇不敢復入境至是悉平詔以巡檢陳敏所部竒兵
四百及汀潭戍兵之在閩者並為殿前司左翼軍即以
敏為統制官留戍其地神武中軍舊止三部自楊存中
職殿嚴始增為五軍又置護聖踏白選鋒策選鋒游奕
神勇馬步凡十二軍時江海之間盜賊間作乃分置諸
軍以控制之如泉之左翼循之摧鋒明之水軍皆隸本
司總七萬餘人由是殿前司兵籍為天下冠存中又制
諸軍戎仗以克敵弓雖勁而士病蹶張之難乃增損舊

制造馬黃弩制度精密彼一矢未竟而此三發矢紹興二十

九年又置
破敵軍

九月壬辰大理寺丞郭唐卿面對乞諸路提刑司詳覆
獄案內有應奏者徑行繳奏毋得再下本州庶幾獄無
留滯詔申嚴行下

丙申司農寺丞周莊仲面對言行在歲支軍糧百五十
萬石惟中下兩界厥房不多遇春冬凍涸綱運不行則
有不繼之患望添造十厥共容三百萬石非凍涸不許

移用歲月滋久則以新易陳戊戌詔戶部措置莊仲武
仲弟也

己亥右武郎兩浙西路兵馬鈴轄曹沒帶御器械

甲辰侍御史兼崇政殿說書余堯弼試御史中丞

丙午端明殿學士兼書樞密院事詹大方薨特贈一官
為左中奉大夫異數也

丁未右司諫兼崇政殿說書巫伋試右諫議大夫

己酉余堯弼兼侍講

辛亥巫伋兼侍講

壬子監察御史張杞試秘書少監

是月金主宣遣兵部尚書蕭裕為廉訪使徧至諸路詢問疾苦自郡守以下皆究其治狀而陞黜之時國嗣未立宣以其從弟北京留守岐王亮為尚書左丞相亮故宋王宗幹子而太祖昊孫也頗矯飾溢名密有包藏窺伺之意以胙王元者亦太祖昊之孫以次當立因河南叛兵有妄稱皇弟者亮誣以語相符合實與結連遂殺

之以金人誅蕭裕詔廢亮詔參修熊克小歷云元地居
嫡長按實乃是嫡長孫元或是梁宋國王宗秀之子
然雖長而非嫡也

冬十月乙卯朔勅令所刪定官威師文面對乞遵天聖
嘉祐詔令將諸路見有丁錢不許折變並令均納見錢
其第五等以下人戶依紹興德音減免其半詔戶部看
詳取旨

丙辰御史中丞兼侍講余堯弼為端明殿學士簽書樞
密院事兼權參知政事監察御史曹筠守殿中侍御史

戊午監察御史陳夔兼崇政殿說書

乙丑上日前日內教武藝至精挽強中的者比去歲多百人更一二年愈加精熟必增多於今日

丁卯上曰紹興府守臣林待聘輕費誕謾宜亟罷免其財賦令戶部經理於是以待聘提舉江州太平興國宮戊辰尚書工部侍郎趙不棄請補外除敷文閣直學士知紹興府時紹興諸邑旱荒民多流散而戶部奏本府苗米及常平義倉有欺隱者十二萬餘石經總制錢五

萬餘緡顯見林待聘輕費妄用不守廉隅乃命不棄經理焉

庚午直龍圖閣知婺州錢端禮劾右承事郎知義烏縣徐時誨不法上曰知縣乃銓注員多難辯直否但治行者優擢罪惡者重責則咸知勸懲因此可以得人才矣辛未右朝請郎通判安豐軍魏持進秩二等以捕紅巾賊首李洪有勞也久之守臣右朝請大夫劉將亦進一

秩將轉官在明
年三月丁未

壬申上謂輔臣曰昨已減諸州月椿錢要當盡罷庶蘇民力櫓即諭戶部侍郎李椿年宋貺以經制錢贍軍然月椿錢卒不罷

丁丑左朝請郎知巴州馮忠恕提點成都府路刑獄公事忠恕汝州人在巴州時提舉茶馬韓球議加茶賦球號令風發下莫敢持議忠恕度不可與爭即自為奏巴州自趙開巴一再增今不可復增茶亦如五穀有凶年遇水旱當榷以實奏下球不敢恨制置使李璆兼治成

都嘗費常平倉米五萬石異時使者以其近臣置不問
忠恕按督得其狀立督趣入之

庚辰龍神衛四廂都指揮使永州防禦使知荆南府王

璋卒

辛巳皇叔泉州觀察使知南外宗正事士珸為平海軍
承宣使以勝任而遷也

十有一月乙酉朔祕書少監張杞言感生帝之祀尚寓
招提祭以酒脯望復用牲玉升為上祀從之

丁酉保信軍承宣使提舉洪州玉隆觀曹勣提舉萬壽觀令台州津發赴行在

戊戌上謂大臣曰來年正旦皇太后慶七十可令禮官檢會國朝典故以聞 祕閣修撰知虔州曾慥移知荆南自渡江以來荆南多命武帥至是闕人上命秦檜以諸路副總管姓名來上檜曰江陵重地所係非輕恐更有可選之人蓋檜欲慥也上曰可徧詢三衙主帥庶得其人不誤委寄後旬日上諭檜曰荆南重地不可不慎

擇今疆場安靜宜用文臣乃以命慥焉

進呈兵官姓名
在十月癸未上

論檜在十

月壬辰

己亥新州編管人胡銓移吉陽軍編管先是太師秦檜嘗於一德格天閣下書趙鼎李光胡銓三人姓名時鼎光皆在海南廣東經畧使王鉞問右承議郎知新州張棟曰胡銓何故未過海銓嘗賦詞云欲駕巾車歸去有豺狼當轍棟即奏銓不自省循與見任寄居官往來唱和毀謗當塗語言不遜公然怨望朝廷鼓唱前說猶要

惑衆殊無忌憚於是送海南編管命下棣選使臣游崇
部送封小項筒過海銓徒步赴貶人皆憐之至雷州守
臣王趯廉得崇以私茗自隨械送獄且厚餉銓是時諸
道望風據摭流人以為奇貨惟趯能與流人調護海上
無薪棄百物趯輒津置之其後卒以此得罪

庚子左朝散郎王曠依舊尚書禮部員外郎以其進頌
忠誠可嘉也 敷文閣待制提舉江州太平興國宮周

綱卒

壬寅左朝奉大夫提舉江州太平興國宮桂陽監居住
鄭剛中再謫濠州團練副使復州安置用右諫議大夫
巫伋再疏也

癸卯降授左奉議郎知真州洪興祖復左承議郎以赦
叙也先是州殘於兵民之瘡痍未復興祖始至即上疏
請復一年租從之明年再疏又從之自是流民漸歸遂
誘溫戶墾荒田至七萬餘畝

丁未龍神衛四廂都指揮使邕州觀察使董先添差兩

浙西路馬步軍副都總管平江府駐劄初岳飛既死先自武昌召還為步軍司統制先與管軍趙密不協於是離軍領殿前都指揮使職事楊沂中憐其才贖遺甚厚具奏乞隸本司朝廷以三衙不許互換陳乞不許

壬子左丞議郎兩浙西路提點刑獄公事吳傳罷以戶部侍郎宋旣接伴北使還劾其病不任事也

十有二月乙卯朔上謂大臣曰聞紹興飢民有渡江者可令臨安優給路費遣還時明越秀潤徽婺饒信州皆

旱民多流散上命有司發粟減賦至是復令常平官親往賑給之母致失所復連州連山鎮為縣

丙辰詔四川命官付身如未經換給並不許奏辟及權攝差遣先是止禁定差至是都大提舉茶馬韓球以為言故有是命

集英殿修撰提舉江州太平興國宮江邈卒已未詔復敷文閣待制致仕

庚申敷文閣直學士知宣州秦棣卒官給葬事棣在宣

城州之何村有富民釀酒棟遣巡檢將吏士捕之夜半
圍其家民疑其強盜也即擊鼓聚鄰里共執之走憩諸
棟棣怒取民及其子孫三人用麻繩通纏其體自肩至
足然後各杖之百及解縛三人皆死其慘毒如此

丙寅詔提舉常平官分遣屬吏賑濟流民且貸其春耕
之費先是詔復民租十之八而和糴尚存海鹽永丁安
義語其令曰歲飢常賦且不充不應復有和糴使上官
怒安義當以身任之檄屢至安義抗論反覆卒賴以免

丁卯布衣孫堯佐上書乞嗣安定郡王與濮王之封詔

大宗正司具名聞奏 尚書省批狀四川營田就委都

統制檢察措置耕種將每年所收斛斗除分給官并糧

留次年種子外盡數報總領所拘收充減免成都府路

對糴米十二萬石之數舊營田事隸宣撫司及司廩乃

有是命

此以紹興三十三年二月十八日工部狀修入
狀稱承紹興十八年十二月十三日指揮而日

歷不載蓋都
省批狀也

戊辰饒州進士張闡上書乞將四等五等下戶紹興十

七年已前拖欠冬苗及諸色官物已倚閣者即與蠲放
未倚閣者即權倚閣上謂大臣曰如實無可納徒有追
擾亦足矜也乃付戶部既而戶部乞諸路災傷及五分
處下戶次十六年租稅除形勢外並與蠲放十七年分
倚閣如違當職官重行黜責仍令憲臣覺察從之

戶部奏下

丁丑 在是月

己巳大理評事莫濛面對論四方之民雲集二浙百倍
常時而河渠為甚急宜命守臣因農之隙濬其堙塞庚

午上諭大臣曰可使漕臣募夫濬治因以濟接飢民則
公私兩利矣濛歸安人也

壬申故迪功郎謝濬特贈右承務郎官一子濬為隴水
尉捕賊死故錄之 是日宰執進呈經界事訖上曰諸
州月椿錢昨已例減要當盡行除罷秦檜即諭戶部侍
郎李椿年宋貺以經總錢措置贍軍

中興聖政史臣曰
大臣苟有以厚民

力固人心雖人主不自言固當奮然以身任之月椿之
為害上至於再四言之而州縣倚椿辨之名因之以巧
取至於今尚存亦足為一時用事者愧矣不惟是也月
椿窠名本出於經總制罷月椿而以經總制錢贍軍此

若有意於奉行者而月椿未罷校終歲經總制之入擇其最者必於州縣取盈焉又非聖上勤恤斯人之意矣夫減月椿免和糴罷免行錢推仁聖之心使天下一日帖帖就安雖瘠己可以肥天下無愛也曹泳輩無所忌憚逞其殘民之術且直為此欺誕大化更行首正三苗之竄宜哉

丁丑太常博士林

宰左丞議郎主管官告院章廈並為監察御史時上召二人入對而廈請戒監司守令奉行賑濟乃有是命奏
廈
札以是月己卯行出今併附此

庚辰金主遣金吾衛上將軍殿前右副都點檢名守忠昭武大將軍同知宣徽院事劉君詔來賀來年正旦君

詔唐盧龍節度使守恭八世孫也父宏遼寧昌軍節度

使金人俾知咸州同平章事

此以金國翰林直學士趙可撰君詔之子宣德軍判

劉某墓
誌修入

名南劍州晉司空張華廟曰應靈

是歲宗室子賜名授官者二十有三人 諸路斷大辟

三十二人

建炎以來繫年要錄卷一百五十八

欽定四庫全書

建炎以來繫年要錄卷一百五十九

宋李心傳撰

紹興十有九年

歲次己巳
九年海陵場
金熙宗宣皇統

王亮天德元年春正月甲
日歷不書

申朔上以皇太后年登七十即宮中行慶壽之禮

此據會要

丁亥詔信陽軍撥隸淮西 詔紹興府第四第五等戶
去年未納租稅並權與倚閣以旱傷最甚用提舉常平

官秦昌時請也

己丑北使召守忠等辭行置酒垂拱殿時在上辛祈穀
祠官致齋之內禮官援治平故事請用樂從之自是以
為例

甲午上諭大臣曰國信所回易北貨恐生事可降旨令
罷將作監丞黃敏行面對乞戒州縣謹務限之制毋
得夤緣追呼以妨東作詔申嚴行下

乙未置撫州樂安縣割崇仁吉水四鄉隸之

庚子直龍圖閣新兩浙東路提點刑獄公事張絢卒
丁未直敷文閣主管台州崇道觀張宗元為籍田令以
其祖俊有請也

己酉宰執進呈春教使効蹠射克敵弓乞依格推賞上
曰此弓最為強勁雖被重甲亦湏洞徹若得萬人習熟
何可當也 宣政使和州防禦使帶御器械康誥為內
侍省押班

癸丑右廸功郎吳仲為大理司直仲初以上書得官既

而久不用至是稍錄之

二月己未端明殿學士提舉江州太平興國宮楊愿知

宣州

庚申顯謨閣學士知建康府鄭滋卒

甲子復置雷州遂溪縣

丁卯詔諸路總領官樂禁如監司例以左朝請大夫監
尚書六部門張頡面對有請也 左奉議郎楊傑知大
宗正丞 左奉議郎范如珪添差權通判邵州如珪為

校書郎以論講和事去國閑居凡十年

乙亥詔自今監司守臣代還入見並令以民事奏陳先是上諭大臣曰監司郡守得替上殿本欲知民間利病近來所奏姑應文書多不及民事宜行告諭故有是旨上諭大臣在丁卯徽猷閣待制知瀘州馮穢陞敷文閣直學士令被授指揮日別理為任

丙子上曰今四境寧息公邊守臣務在安靜若任滿不生事可量緊慢取旨推賞復置太社令以左奉議郎

直敷文閣韓彥直為之以世忠有請故也

丁丑左朝請大夫童邦直知峽州還言湖北溪峒醞造
蠱毒以害往來之人又夷人以人鬻鬼安復荆門鼎澧
獨行之人或罹此禍望令廵尉覺察上諭大臣曰邦直
二說皆可取當行之

戊寅左中奉大夫知利州王賞充祕閣修撰提舉江州
太平興國宮從所請也

庚辰上謂輔臣曰每歲所市馬悉付鎮江王勝軍令養

而未見孳生之數宜分送諸軍仍立賞罰於是歲發川
馬二百匹進御而以四千匹付江上諸軍鎮江建康荆
鄂軍七百五十江池軍各五百又以秦馬三千五百付
三衙殿前司千五百馬步司各千自是歲為定例二十二年
所書可參考 封尚儀袁氏為宜春郡夫人

辛巳詔臨安府日下給米賑濟流民時浙東大饑其小
民行乞都市有餒死者上聞閔焉故有是命 右宣教
郎王秬幹辦行在諸軍審計司秬雲子也先是上諭大

臣以雲頃年奉使忘身為國至於不免忠義可嘉宜錄

其後乃賜秬銀帛五百匹兩而命之

上諭大臣在庚申賜秬金帛在甲子

今聯書之熊克小歷稱秬為
奉議郎與日歷不同恐悞

三月癸未朔日有食之陰雲不見上不視事百官守職
過時乃罷

甲申詔皇太后慶壽親屬各進官一等慈寧殿官推恩

有差

己丑右武大夫平海軍承宣使蔡德除名廣州編管德

為建康府駐劄御前破敵軍第三正將冒請錢糧法當死特貸之

庚寅宰執進呈普安恩平二王得旨令溫習舊書上曰春秋乃舊所習讀朕嘗問以經中數事欲其通解蓋其義淵奧湏能識聖人之用心有自得處若泥諸儒之說拘而不通失經旨矣時普安郡王在藩邸絕意聲色常以經史自娛凡六籍之文悉加講論夜則觀古人文集暇則握筆賦詩鼓琴習射而已

丙申上語秦檜聞諸郡奏獄空例皆以禁囚於縣獄或廂界寄藏此風不可滋長自今有奏獄空者當令監司驗實如有妄誕即行按治仍命御史臺察之若不懲戒則奏甘露芝草之類崇虛飾誕無所不至矣

戊戌左朝奉大夫知復州劉時代還言湖北縣令有七八年無正官而以寄居待闕官攝之者事多曠弛民受其弊望許諸司及本州不以拘礙選辟能吏庶幾縣有正官官事修舉上謂大臣曰可令吏部趣已差人之任

未差者速出闕無人就則下所屬辟差

己亥德慶軍承宣使提舉萬壽觀韋謙為建寧軍節度使慶遠軍承宣使提舉萬壽觀韋謹為重慶軍節度使用慶典也

庚子上諭大臣曰淮甸久平宜加經理民復業者令守令多方恤之使盡力田畝數年後方可起稅

甲辰起居舍人王墨卿罷以殿中侍御史曹筠論墨卿貪墨嗜利與林待聘既黜乃懷怏怏動欲傾危朝廷故

有是命 詔責授濠州團練副使復州安置鄭剛中許

用議減特免禁錮移封州安置初秦檜怒剛中不已捕

其子右承務郎良嗣與將吏賓客即江州同繫遣大理

寺丞湯允恭

允恭初見建炎三年二月

太府寺丞宋仲堪往鞫其事

掠治無金膚獄成剛中坐任四川宣撫副使日被旨收

捉過界偷馬盜賊全不遵奉凡事于邊界常是懷姦異

議陰與見在罪籍人符合交通沮害國事又輒違朝命

出賣度牒收錢五十五萬餘緡又專輒起置錢監鑄錢

擅便支使及違法請過供給厨食等錢一萬三千餘緡
入己剛中欲併都轉運司入宣司遂將錢物贈遺士人
令赴行在上書開陳既併運司違法私使過錢十二萬
餘緡及有詔置總領錢糧官剛中不喜預作緣故收椿
隱匿錢計四千餘萬緡又欲歸怨朝廷乃說諭統兵官
今為總領盡數交併錢物無可送遺及被旨令赴行在
乃忿怒遷延收匿劄子不即起發多帶官物在路妄用
法當死特有是命良嗣貸死送柳州右朝請郎張漢之

嘗主管宣撫司機宜文字坐依隨剛中亦除名送賓州並編管右奉議郎趙士禡嘗通判荆南府坐不即拘收剛中隨軍錢物特除名右武大夫開州刺史御前中部統領官張仲亦坐依隨剛中追橫行一官勒停送本軍自効即日擢允恭尚書刑部員外郎仲堪倉部員外郎剛中至貶所守臣左朝請郎趙成之希檜意每窘辱之剛中竟卒於貶所

中興聖政講義曰秦檜之收三大將兵權也剛中阿於檜曰前所共憂者

一旦便為安平之道廟堂不動聲色而三大將惟恐奉上兵籍之不先彼曲士不通世務挾口以議政者亦皆

言塞意順謂此非常之舉因為檜陳善後之策凡七事
非不忠於檜也一旦積怒貶死遐荒將吏賓客無得免
者則人之附麗匪人以媒進取者亦可以為殷鑒矣 將作監丞黃敏行權尚書
兵部員外郎往四川諸路措置遞角敏行增銷益兵所
費甚廣紹興末卒罷之

乙巳上謂大臣曰牧馬孳生為利甚溥朕令牧於近地
今已見效歲進馬駒皆佳者若得萬匹分與諸軍數年
間便可濟用既免綱馬道斃且無賞給之費也

丙午右武郎添差兩浙西路馬步軍副都總管劉懋為

右武大夫吉州刺史懋以解帶恩乃有是命

丁未右諫議大夫巫伋言近者監司帥臣與列郡守倅
有因失懼遂相告論者望申嚴戒諭自今並先次罷黜
然後付有司理辨曲直庶幾崇推遜之風銷刻薄之俗
從之

戊申左朝散大夫知普州王輔代還言仁政必自經界
始尚恐蜀遠未開措畫或有謬誤乞誠勅有司刻意奉
行上曰四川道遠儻如輔所陳則稅愈不均矣可令措

置經界官覺察奏劾

己酉進呈上曰州縣官奉行如法其推恩勿限員數庶人人知勸正經界均稅賦極為便民推行之初臣僚有肆異議圖沮壞者暨平江均稅畢紛紛之議始息秦檜曰當時獻議欲使逐戶自陳豈無失實上曰李椿年通曉次第中間以憂去他官領之便有失當處尋以輔知

合州輔初見紹興十二年正月時勅令所刪定官鄭克經界四川頗

峻責州縣其所謂省莊田者雖蔬菜桑柘莫不有征而

邛蜀間民田有什稅五者由是迄今多逃田克開封人也

庚戌諸王官大小學教授葉紓面對言自祖宗以來定公私贓三等之罪其意未嘗不重於保護斯民而已向緣官吏率多不定罪而民被其害是以又標立民事一罪以戒懼之然因公則多涉於民因私則雖重有與民事不相干者故公罪雖輕而麗民事遂為終身之累反甚於得私罪之重者吏因得舞文而出入之不可不察

也欲望明勅有司更加詳議庶協于中詔勅令所看詳

申省

事初在紹興七年十二月今年八月辛亥勅令所看詳不行

夏四月癸丑詔四川制置司官屬將吏請給令總領所歲撥錢萬緡如軍中非泛激獮並取旨本司舊有抵當熟藥息錢仍充經撫蠻夷之用從戶部裁定也

乙卯權禮部侍郎陳誠之權知閣門事孟思恭賀金主生辰還奏檜白上曰大金書詞丁寧盟好甚切上曰此番待奉使愈周至館舍極宏壯思恭等所得馬亦皆上

馳可知其永好之意也

丁巳樞密院承旨上孳生牧馬監賞罰格

戊午殿中侍御史曹筠言樞密院編修官何逢原頃在
館中公於奏對之間謂沮抑用兵之議太過司勲員外
郎沈介為禮部長貳腹心乃相與陰謀傾朝廷此二人
者若不斥遂無以濟今日聖治詔垂罷介為禮部長貳
腹心不知謂誰
當考去年七月禮部侍郎周執羔
罷八月沈該知潼川府或即此事 承信郎閻門祗候
劉允升幹辦御輦院允升懋子也

己未上曰治道民事為急數十年來吏習苟簡民受其
弊必令監司守臣遵奉詔條留意拊循使民樂其生秦
檜曰保正者戶長元立法止令管煙火橋道今承文書
市物顧夫以至縣官之所私用種種責辨民之所病莫
大於此革而去之其利不減於經界上曰朕頃在河朔
親見其弊若縣令不得人民一充役即破產能去此弊
極為便民

庚申詔諭御史監司守臣如前旨

熊克載此詔於六月
己未蓋差兩月中

興聖政臣留正等曰民以役而破家其為吏者倚法之弊也誠為人上者若難於知之雖極糟糠憔悴之情曾不足以動膏梁怡愉之色非必皆忍人也其事未嘗知之故難於聽之也太上皇帝在河朔時親見弊事端居九重而每以百姓為念知艱難而問疾苦中興之業成有自矣

壬戌皇姪和州防禦使居廣為瓊州觀察使居廣安時子也娶皇后姪女特遷之

癸亥宣州觀察使兩浙西路馬步軍副都總管王安道為武泰軍承宣使以其父繼先該慶壽恩回授特轉行也

丙寅祕閣修撰主管台州崇道觀張邵言恭惟陛下當
宣和靖康之間為國捍難適丁大變仗義而起獨患曩
時相臣未能仰副陛下委任之意或駿駿欲用兵則已
無才能不度事勢之可否或但持兩端則自為身謀不
恤宗社之阽危唯師臣檜蘊精深高世之識灼見南北
兩朝事體別白利害力贊陛下兼愛赤子敦講和好用
息兵靖難再造太平此非特臣能知之九州四海遐陬
異類亦能知之非特史能書之黨庠家塾雜記小說亦

能書之顧有陰功隱德世所未及知者臣請得言之焉
臣於建炎三年被旨出使敵軍適逢檜於路策蹇衣褐
有顛頽色蓋被執而訓讀童蒙以給朝夕亦猶蘓武食
窖中之氈雪賴以偶活其命留為今日中興之用其後
臣益北徙至金所謂中京者已而二聖稍東有隨駕醫
官七八輩因留而居一日同過臣言聞秦中丞已間行
南歸矣有榮州團練使李子厚言秦公曾為徽宗皇帝
撰長書抵金帥尼瑪哈引大義以譙責之尼瑪哈有慚

色及臣南歸渡江有為臣言曾有自金傳寫得其書藁觀之者今士大夫間往往有之臣親見于厚言其事如此則知檜昔在金固有陰功隱德及於天下社稷者多矣特耻自衒不欲言於人是以世不得知之臣常恐一旦先狗馬填溝壑則我朝賢相道義忠節終莫聞於世誠日夜以為歎伏望宣付史館以彰陛下任用之當所以能致中興之盛簽書樞密院事余堯弼曰書論秦檜忠節天下所未及知上曰得此書庶幾不致曖昧可付

史館堯弼曰邵書篇末言檜嘗為徽宗皇帝撰書抵金國元帥其所開陳與今日事無一不合者聞勛家有錄本乞宣取同付史館上曰善

戊辰秦檜奏昨日蒙御前降到曹勛所藏臣向在北庭代徽宗作書藁書中開陳與今日事無一不合因請講和本出徽宗聖意上曰自頃用兵朕知其必至於講和而後止在元帥府時朕不知有身但知有民每惟和好是念檜曰此所以誕受天命上又曰用兵蓋不得已豈

可樂攻戰本朝真宗與契丹通和百餘年民不知兵神
宗雖講武練兵實未嘗用朕自始至今惟以和好為念
蓋兼愛南北之民以柔道御之也

檜所草書本具建炎二年六月末此不別

出右朝靖郎孫世顯知沅州代還言本州麻陽縣至
今尚行差役事體未便乞改作募役詔本路常平司看
詳申省是日日左右生青赤黃珥太史局言係是祥
應乞付史館從之

庚午尚書司封員外郎湯思退試祕書少監度支郎

中徐宗說為太府少卿宗說在度支會右曹金部皆闕
官因令兼領三曹金穀之地而宗說素有心計於天下
經費出入盈縮之數莫不通知老吏為之斂手

癸酉敷文閣待制提舉佑神觀米友仁陞直學士 太
常丞胡寧守尚書祠部員外郎

戊寅祕閣修撰主管台州崇道觀張邵充敷文閣待制
提舉江州太平興國宮制詞略曰惟時秉節之臣親見
特書之事誦說賢宰彰明大功邵自北方還即被逐閒

居凡七年乃上此奏焉 建康府言甘露降

是月太白蝕月

此據苗耀神麓記日歷四月九日庚申是夜太陰行在太微垣內不犯星二十

一日壬申是夜太陰行在羽林軍內不犯星乃不見月蝕事不知何也

金國太史言不利

於君大臣將作亂又風雷大作有龍自寢殿而出火焚
壁幕及地衣金主惶震懼遂大赦翰林學士承旨張鈞
為赦文曰乃者龍潛我宮亶大怒曰龍若我何遂杖鈞
數百截其手足而斬之

五月壬午朔詔汀漳泉三州且據見令耕種田土紐計

頃畝收納二稅其未耕種田段二稅權行倚閣時初行
經界法於諸路而劇盜何白旗擾汀漳諸郡故有是旨

二十一年七月己酉再降旨住罷

癸未詔諸州招填闕額禁軍守臣兵官同賞罰仍月申
樞密院前一日上以此事諭大臣令留意及是進呈上
因言頃程師因捕賊處多用本處兵若招填數足練習
武藝緩急可用也

甲申始崩太廟齋殿

乙酉戶部員外郎周莊仲面對請復蜡祭之禮其禮東
西方百神視感生帝南北方視嶽瀆皆以曆前一日祭之
庚寅祕閣修撰都大提舉四川茶馬公事韓球與直祕
閣知夔州符行中兩易

癸巳慶遠軍節度使知襄陽府張澄知洪州 敦文閣
直學士提舉江州太平興國宮魏良臣知廬州

甲午建康諸軍都統制王權言揀汰兵數上曰諸軍闕
額湏令招填不然恐傷兵數自今令具已招之數申樞

察院直龍圖閣知婺州錢端禮罷端禮與右奉議郎通判州事呂忱中互訴故皆黜之

丙申大理少卿許大英面對論監司守令以私已之怒囚無辜於獄中名曰寄禁乞令憲臣稽察詔申嚴行下丁酉龍神衛四廂都指揮使宣州觀察使殿前司選鋒軍統制劉寶為捧日天武四廂都指揮使武泰軍承宣使錄平閩盜之功也其將校軍兵義兵三千一百七十人各遷官及減磨勘年有差

己亥秦檜奏以敷文閣直學士吳表臣知婺州檜言比
年外患已寧惟郡守得人則奉行德意民被實惠上曰
然在謹擇之

庚子金主使龍虎衛上將軍殿前左副都點檢唐古德
溫昭武大將軍四方館使高居安來賀天申節

丁未左承議郎王大寶知連州代還言連英循惠新恩
六州居民才數百非商販之地月輸免行錢望更審量
裁減上謂大臣曰守臣上殿令以民事奏陳遂得知民

間疾苦所陳五六得一可行為利不細乃命本路漕司具合減數申省太寶潮陽人也

庚戌左中大夫提舉台州崇道觀禁賓卒

六月辛亥朔戶部員外郎周莊仲面對言浙西積水之患平江為甚平江秋苗三十四萬石以積水蠲放者歲三之一積水之處皆昔日膏腴之地望委常平官督責令佐多方勸誘修築成田如民戶不來即官為拘收召人請佃如此人當自勉不惟官得十萬而民間所得當數

倍矣詔戶部看詳申省

故事宗廟時祠以宗室觀察使以上充初獻刺史以上
充亞終獻其後以宗室數少乃請初獻以防禦使以上
亞終獻以遙刺以上十二年十月戊寅至是宗室正任止三人
壬子太宗正司請權以遙團以上充初獻將軍以上充
亞獻許之

甲寅敷文閣直學士知廣州王鉞卒詔鉞肺司宣力賜
其家銀帛五百匹兩令江西轉運司應副葬事 集英

殿修撰知福州薛弼移知廣州初以廣東羣盜尚多詔
殿前司摧鋒軍統制官韓京戍梅循以彈壓因命為廣
東馬步軍副總管提舉漳處吉州捉殺盜賊兼知循州
久而未代秦檜慮其難制諭弼使圖之弼至南雄州京
迎見弼即席諭之京乞罷遂遣人衛京出嶺亟命武功
大夫張寧馳入戍所以統其軍此以熊克小歷修入克
止云亟命別將而無其名以日歷考之代韓京為摧鋒軍統
制者張寧蓋寧自閩中從弼入嶺也

丁巳左廸功郎王庭珪特勒停送辰州編管庭珪安福

人胡銓之貶也庭珪為衡州茶陵縣丞以詩送之有曰
癡兒不了公家事男子要為天下奇銓鄉人歐陽安永
告之以為謗訕朝政事下虔吉兩郡而守臣曾慥王珉
江西路提點刑獄公事李芝不切究之會芝奉祠直祕
閣林大聲代芝提點刑獄亦寢其事敷文閣待制沈昭
遠知洪州白發之時大聲已去而昭遠與降授右朝議
大夫江西轉運副使勾光祖以他事交章俱罷庭珪遂
坐貶久之慥珉芝大聲與兩郡倅左中大夫吳溫彥右

承議郎杜師伋皆坐降一官溫彥德州人也

大聲以十八年閏八

月罷江西提刑照遠光祖以今年五月己亥罷帥及漕
慥等以二十一年八月癸酉降官今聯書之胡銓自跋
戒諭和議詔書序此事乃云太守吳溫
彥運使林大聲贛守曾慥皆小誤也

戊午太師尚書左僕射提舉詳定一司勅令秦檜上吏
部續降七司通用法四百三十五卷

辛酉右朝奉郎朱同知南雄州代還言嶺南無醫凡有
疾病但求巫祝鬼卜手待斃望取古今名方治療氣者
集為一書頒下本路從之

熊克小歷載此事
於辛亥朔蓋誤

壬戌徽猷閣直學士提舉江州太平興國宮沈晦徽猷閣待制提舉江州太平興國宮林保卒

癸亥左朝請郎趙善瑛知封州代還論廣東諸州田稅不足歲用自祖宗以來不問有無田產常計丁歲納身米以補常賦每有收免丁者於見納米人均增均減其法甚備今來州縣奉行不虔隱落白丁不可勝計使見納丁米之人無從均減望令專一置籍記其丁口每歲稽考庶幾課役均一詔戶部措置 右宣教郎直祕閣

高百之提舉兩浙路市舶

乙丑和安大夫高州防禦使諺御脈樊和彥令臨安府
差人管押出門於處州居住坐用藥紝繆也

此項未知與紹興三

十一年八月辛亥杜起莘論王繼先等十罪有無相關當考

己巳龍神衛四廂都指揮使定江軍承宣使主管侍衛
步軍司公事趙密為崇信軍節度使

辛未刑部員外郎章憲面對論州縣推鞫追運干證之

弊詔申嚴行下

壬申殿中侍御史曹筠入對論溧陽知縣馮廸德長洲
知縣尹機前任不法事機趙鼎客也

機已見紹興癸酉六年二月

進呈上曰二人罪頗大可令取勘俟案上當重責之

甲戌兩浙轉運判官提領營田曹泳言根括得鎮江府
荒田二千二百餘頃望悉以為營田從之 刑部員外
郎湯允恭面對乞戒有司凡制獄具並依成式長吏親
閱用印方得行使詔申嚴行下

丙子上謂大臣曰閩中盜已漸弭惟海道間有作過可

諭帥憲察巡尉之不可仗者代之 左朝請大夫王普添差通判邵州代范如珪也二人嘗官館學為秦檜所怒終其身以郡倅處之

丁丑龍神衛四廂都指揮使建武軍承宣使主管侍衛馬軍司公事田峩添差兩浙西路馬步軍副都總管請給與免借減 捧日天武四廂都指揮使武泰軍承宣使殿前司選鋒軍統制劉寶主管侍衛馬軍司公事右宣教郎直敷文閣秦頃進職一等頃妹孺人秦氏特

封令人以檜進書恩回授也



建炎以來繫年要錄卷一百五十九

建炎以來繫年要錄卷一百五十九金人地名考證

尼瑪哈

原書作粘罕
誤改見卷一

唐古

原書作唐
括今改正

欽定四庫全書

卷一百五十九